

## MUBAREK NOĆI



### **Mevlud povodom Lejle-i-Mi'radža**

Druga po redu mubarek noć u mjesecu redžebu, noć Isre i Mi'radža, svečanim i mevludskim programom je obilježena i u našoj džamiji. Nakon klanjanja akšam-namaza, prisutnim džematlijama se prigodnim vazunasihatom obratio glavni imam, hafiz Aziz ef. Alili. Programom satkanim od Kur'anskih ajeta, ilahija, kasida, salavata i mevludskih/miradžskih spjevova – džematlijama se pokušao približiti događaj što se Mi'radž zove. U programu, kojeg je pripremila muallima Lamija Alili, sudjelovali su imami, mujezini, softe, ali i vrijedni bivši i sadašnji polaznici vjeronauka, poput Amine Omanović Kazaferović i Ahmeda Alilija, koji ovu džamiju i njezine aktivnosti doživljavaju svojim i koji nesebično daju svoj doprinos kako bi ovakve svečanosti bile što uspješnije. Molimo Allaha dž.š., da ukabuli mevludi-šerif i ibadete u ovoj mubarek noći.



### **Iftar povodom Lejle-i-Regaiba**

Džamije su Allahove kuće, pa se vjernik u njima uvijek osjeća ushićeno, zadovoljno i bogobojaznošću ispunjeno. No onaj, tko se u četvrtak, 09.06. 2011.god., na sedmi redžeb, u akšamski vakat zatekao u Zagrebačkoj džamiji, mogao je doživjeti mnoge čari, ljepote i blagodati našeg dinislama. Kao rijetko kada, na akšam-namazu, dominiraše naše hanume - vrijedne i drage džematlijeke, koje su postom obilježile još jedan muberek dan mjeseca redžeba. Napola osvijetljena džamija, nurla lica i kićena odjeća naših hanuma u džematu, učenje ašereta – nikoga ne ostaviše ravnodušnim! Zajedničkim iftarom u restoranu Islamskog centra, potom vazuu nasihatom i kraćim druženjem u divanhani, osvježiše svoje znanje o fadiletima Lejle-i-regaiba i blagodatima mjeseca redžeba koje se vjernicima, a napose postačima, obećavaju.

Da nam dragi Allah ukabuli naše ibadete i ovakva i slična okupljanja ubroji u dobra i korisna djela.

Allahumme barik lena fi redžebe ve ša'bane ve belligna ramadan!